

DEO FAVENTE.
DISPUTATIO MEDICA INAUGURALIS,
ex
Fundamentis Hippocraticis & Hermeticis
illustrata,

De
CANCRO.

Quam
JUSSU ET DECRETO
splendidissima & Gratosissima Facultatis Medica,
in perillustri & florentissima SALANA,
PRÆSIDE

Amplissimo, Excellentissimo, & Experientissimo
VIRO,

DN. GOTHOFREDO MOEBIO,
Medic. Doctore, & Professore Publico celeberrimo,
Facultatis Medicæ p.t. DECANO spectatissimo, Hermete nec
non Practico famigeratissimo, & felicissimo, Domino Præceptore,
Patrono, & Fautore suo plurimum observando,

PRO LICENTIA

summos in Arte Medicâ Honores, Dignitates, ac Pri-
vilegia DOCTORALIA legitimè consequendi
Publico Eruditorum Examini submittit

M. JOHANNES NICOLAUS FINCKIUS,
Smalcaldiâ - Francus,

D. 9. Augusti
Horis locoque consuetis.

85
VIRI
AMPLISS. CLARISS. SPECT.
TISSIMIS ET PRUDENTISSIMIS,

Dnn. PRÆTOR
CONSULIBUS, COETH
RISQ; SENATORIBUS LAUDA
TISSIMÆ REIPUBLICÆ SMALCAL
DIENSIS DIGNISSIMIS, OMNI-
BUS AC SINGULIS FAUTO-
RIBUS, ET AMICISSUIS
HONORATISSI-
MIS,

DISPUTATIONEM HAN
MEDICAM DOCTORALEM

SACRAT

AUTO

DEO FAVENTE.



Nter tumores, qui p. n. hominem affligere solent, periculosissimus ferè est, qui Cancri nomine indigitatur. Etenim sive refractarium ejusdem genium attendas; sive loca, quæ non rarò satis nobilia infestat, perlustres; sive graviora symptomata concurrentia, dubiumq; curationis eventum contempleris; nil nisi miserrimam hâc labe laborantis ægroti conditionem deprehendes, ut adeò *Divinus Senex. 6. aph. 38.* hunc affectum non curare interdum meliùs & consultius esse, non immeritò existimet. Quum verò, quæ majori cum periculo conjuncta, majori studio pertractanda sint, *Gratiosissima Facultas Medica* facem mihi hâc in parte præferre voluit, authorq; fuit, ut hunc morbum præ cæteris perscrutatu necessarium, ventilatu dignum, publico eruditorum examini, loco Inauguralis Disputationis proponerem. Hisce ergò mandatis obsequi omninò erat æquum. Largiatur Deus Opt. Max. istis meis conatibus exoptatum eventum, & faxit, ut cedant in nominis sui gloriam, Nobilissimæ Artis Medicæ incrementum, plurimorumq; ægrotorum desideratam salutem!

Vocabulum CANCRI è Græco in Romanum deductum esse forum videtur; siquidem originem suam habet ab antiquo $\gamma\acute{\alpha}\gamma\epsilon\theta$, quo de *Becmann. in Origin.* agit. Nonnulli à $\gamma\epsilon\acute{\alpha}\omega$ i. e. $\epsilon\acute{\alpha}\theta\iota\omega$ derivari scribunt; vel ut *Hesychius* vult, à $\gamma\epsilon\acute{\alpha}\iota\upsilon\epsilon\iota\upsilon$ edere, comedere, unde 2. *Tim. 2, 17.* legitur: $\acute{o}\ \lambda\acute{o}\gamma\theta\ \alpha\upsilon\tau\acute{\omega}\nu\ \acute{\omega}\varsigma\ \gamma\acute{\alpha}\gamma\epsilon\theta\alpha\iota\upsilon\alpha\ \nu\omicron\mu\eta\acute{\nu}\ \epsilon\acute{\chi}\epsilon\iota.$

Sumitur aliàs, ut etiã iis notum, qui nondū ære lavantur, modò pro animali aquatico, modò pro cœlesti sydere. In Foro autē Medico *Cancri* voce ille affectus salutatur, qui aliquale canceri animalis fluviatilis speciem, venulis vitioso sanguine turgentibus repræsentat, ut videre est apud *Gal. 2. ad Glauc. c. 10.* ubi inquit: *In mammillis sæpè vidimus tumorem formâ ac figu-*

et à cancro animali exquisitè consimilem. Nam quemadmodum in isto pedes ex utraq; parte sunt corporis: ita in hoc morbo vene distenduntur ac figuram omninò similem cancro representant. Et in hoc significatu à Chirurgis dicitur interdum I. GENERALITER sive improprie, de tumoribus perversis & pustulis, sicuti furunculo & carbunculo, tumore sub oculo in illius orbita nato, polypo in naribus, & gangrænâ gingivarû, teste Felici Plater. Prax. tr. 2. c. 17. Sic & Celsus lib. 5. c. 26. Cancrî nomen pro genere de quibuslibet serpentibus ulceribus usurpat, sub quo & Erysipelas ulceratum & gangrænâ & sphacelû comprehendit. A quibus tamen verus Cancer longè differt. II. SPECIALITER verò & proprie acceptus, denotat tumorem cum vel sine ulcere durum, cancrî fluviatilis formam externam & mores imitantē. Atq; tumorem hunc Cancro aquatili in figurâ (qualem Ambros. Pareus l. 6. de tum. cont. nat. in gen. c. 26. adpingit) adsimilari posse, Medicorum coryphæi, iiq; plurimi testantur. Unde Johan. Bapt. Montan. Cons. Med. tumorem cancrî, corpus, venas verò brachia appellat. In substantiâ quoq; est similitudo; quia ut ait Aëtius l. 16. c. 43. tumor iste habet superficiē inæqualē, asperam, & duram, qualis & cancrî marini testa sive crusta existit. Item in moribus cancrum marinum imitatur. Sicut enim cancer animal, cùm quid suis forcipibus adprehenderit, arctissimè illud retinet, vixq; ab eo potest avelli: ita morbus isthic difficilè admodum partem quam invasit, deserit, prout Fallop. tom. 3. c. 19. ait. Petr. Forest. observ. Chirurg. l. 4. de tum. p. n. refert; tumorem hunc & cancrî animalis colorem representare, nempe subnigrum.

Græcis communiter vocatur καρκίνος, & καρκίνωμα; Arabibus sartan, & aliquibus cancrusus tumor. Alii Lupum haut absurdè nominant: quoniam carnes gallinacæ si adponantur, quotidie ferè absumit & devorat; vel si illi pro pabulo non offerrentur, carnes proximas, ceu lupus quidam famelicus, ad eandē quantitatem depascit. Quidā affectum hunc, Noli me tangere appellari posse putant, quod acria non ferat medicamenta: quantò magis enim sinistrè tractatur, tantò magis indignatur. Germanorum Dialecto audit der Krebs oder der Wolf.

Solf. Nec defunt qui canceri nomen tantummodò tumori
nondū ulcerato, carcinōmatis verò vocabulū jam exulcerato
tumori attribuūt; tamen plurimi Artis Asclepiadēæ Proceres
synonyma esse volunt, quorū vestigiis & mihi insistere libet.

Præmissis hisce, quæ ad cognitionem τὸ ὀγκισμὸς ἐνο-
ματώδην pertinent, ad ipsam πρᾶγμα τώδην, quæ propius ad
Indicationes Curatorias me deducit, accessū facio, & Can-
crum definitio, quod sit *tumor p.n. cum vel sine ulcere durus,*
tactui renitens, dolens, calidus sed absq; febre; modò ina-
qualis, modò rotundus. livescens, vel subniger, venosus, &
canceri animalis marini formā representans, inq; partibus
carnosis ab humore atrabilario adusto & corrupto exortus.

GENUS, quod formæ locum obtinet, est tumor p.n. sive
morbus instrumentalis in auctâ magnitudine: quia pars ali-
qua à naturali statu, magnitudine auctâ recedit. P.n. addo,
quoniam non omnis tumor, ut uteri prægnantis, mamma-
rum lacte turgentium p.n. est. Hinc etiam *Galenus librum*
suum de tumoribus non simpliciter, sed de tumoribus p.n. inscri-
bit. Alias quidem *Galenus* an tumor ad morbos organicos,
an verò ad partes similes pertineat, dubios nos reddere vi-
detur. Etenim *1. de caus. sympt. c. 2.* tumores ejusmodi ad mor-
bos organicos refert, dum *Φλέγμανας*, scirrhus, abscessūs, &
id genus alios morbos instrumentalium partium esse, clarè
scribit. *De diff. verò morbor. c. 13. & de caus. morb. c. 6.* inter in-
temperies & similiarium partium morbos tumores recenset.
Ex Recentioribus etiam *Eustachius Rudius, Hieronymus Capi-*
vaccius, Fallopius, Fabricius ab Aquapend. aliq; non unum
idemq; sentiunt. Verum enim verò, ut breviter me expe-
diam, tumorem ad morbos instrumentales in auctâ magni-
tudine pertinere, intemperiemq; interdum ceu morbum si-
miliarium partium accedere posse liquidò adfirmo. Qua-
tenus ergò cancer est cum tumore & intemperie, morbo est si-
miliarium partium, & simul instrumentalium in auctâ ma-
gnitudine. Quatenus verò ulcus accedit, solutæ etiam uni-
tatis affectus, & sic complicatus morbus nominari potest.

Tumor hic in principio levis est, qui progressu temporis, sapiculè & subito teste *Mercato*, in notabilè adfurgit molè, qualem *Excellentissimus Dn. Praeses, Praceptor & Fautor meus honorandus*, nuper in *Ducali Schöningensium urbe*, in civis cujusdā filiā animadvertit. Est cum vel sine ulcere, pro causæ mitioris vel acrioris ratione. Quæ enim bilis atra mitior, cancerum latentem & non ulceratū excitat: Quæ verò calidior & acrior est, exulceratū efficit. Acrior autem est bilis atra, prout magis aduritur, vel ex humore acriore oritur. Unde quæ ex flavâ bile adustâ proficiscitur, pejor est quàm quæ ex humore melancholico. Quo diutius etiam in loco affecto subsistit, ac magis putrescit & aduritur, eò deterior redditur, & citius in ulcus transit, *Galen. 14. meth. c. 9. Durus est*: quia oritur ab humore sicco, feculento, adusto, salino & Tartareo; qui à mitioribus succis sequestratus, & in extremitatibus vasorū coacervatus, quum ob crassitiē penetrare nequeat, tumore durū, qualiter etiā in scirrho fieri videmus, non potest non conflare. *Et tæni renitens est*. Renixus, inquit *Gal. 14. meth. med. c. 9.* hisce tumoribꝯ valens est: ac si venas evidentiores membrū habere, exaltatas eas à crasso & nigriore quodammodo sanguine, cujusmodi per alvum aliquando non paucis epaticorum excernitur, videre licebit. *Dolor* conjungitur: quia humor acris partes sensiles distendit & lancinat. *Calidus etiam est*: quia ab humore calido, atrâ bile ortū habet. Quamvis enim nonnulli in dubiū vocent, an bilis atra sit calida an frigida; & ab *Arabibus* præterea inter frigidos morbos cancer recenseatur, atq; in eam sententiam *Gal. 1. de atr. bil. c. 4.* descendere videatur, ubi ait: *Quæ suâ crassitudine per cutis densitatē traduci nō possunt, sed intus coërcentur, detinenturq; si calida sint, carbones, sin minus talia, cancros progignunt*: tamen rectissimè cum *Galeno 1. de tumorib. c. 8. 10. 11.* inter tumores calidos numeratur, quum non ex humore melancholico frigido & sicco; sed ut dictū, ex atrâ bile calidâ & siccâ ortū habeat, *Sennert. 1. 5. Prax. part. 1. c. 20. Absq; febre quoq; est*: Licet enim calidus tumor sit, non tamē æquè calidus est ac inflammatio, ut habet *Mercatus Instit. Chirurg. 1. 1. instit. 7.* Unde etiam absq; febre excitatur: quoniā bilis atra ex fervore aliorum humorum, cessante tamen jam

fer

fervore, aut saltem non adeo vigente, ut febrem excitare possit, sicut in phlegmone, & erysipelate fieri solet, generatur. Porro tumor hic modo inæqualis, modo rotundus, item livescens, subniger & venosus est, cancriq; animatis formam representat, nimirum pro qualitate & ratione adfluentis materiæ, nec non conditione partis recipientis variat, ut colligitur ex Galen. 14. meth. med. c. 9. & l. 2. ad Glaucon. c. 10.

SUBJECTUM sive Partes adfectæ in Definitione proponuntur *μέρη σαρκώδη* sive Partes carnosæ. Per partes autem carnosas non carnem musculosam solum, verum etiam omnes alias carnis, ut viscerosæ, glandulosæ, & membranosæ differentias, prout aliàs à Ruffo Ephes. Hippocrat. & Galen. declarantur, intelligo. Hinc cancerum in omnibus hisce partibus generari posse, statuo. Quod clarè liquet ex Galeno ad Glaucon. l. 2. c. 10. quando cancriferos tumores in omnibus quidem partibus corporis fieri, imprimis tamen in mammillis mulierum, quæ purgationem secundum naturam non habent, exoriri adfirmat. Et hoc fidissima rerum magistra, experientia attestare videtur. Nam in faucibus, Medicorum Princeps Hipp. 7. epid. Victor Trincavell. l. 3. consil. iii. in lingvâ, Forest. l. ii. observ. 21. in oculi cantho, & Aët. l. 16. c. 96. in utero, multiq; alii in mediâ corporis parte, & in tibiis & cruribus exortum observarunt. Præcipuè verò nascitur, ut habet Celsus l. 5. c. 28. in partibus superioribus circa faciem, nares, aures, labia, mammæ foeminarum, quæ imprimis ob laxitatem facile humorem adfluentem recipiunt, & ob consensum, quem cum utero habent, vitiosos illos humores per uterum expurgandos promptè admittunt.

CAUSA IMMEDIATA juxta Dogmaticorum Medicorum sententiam est humor atrabilarius adustus & corruptus, ex flavâ bile, vel humore melancholico, feculento, & Tartareo aliisque humoribus, generatus. Hic humor, quando nimis cumulatur, à natura ceu molestus expellitur; quumque non semper vias ordinarias excrementorum evacuationibus destinatas invenire queat, ad peripheriam partis internæ vel externæ protruditur, ibique, cum ad alendum sit ineptus, in

vena

venarum extremitatibus coacervatur, corrumpitur, & non raro malignam quandam qualitatem induere videtur. Nec id mirum cuiquam accadat. Nam omnis humor, quando quiescit, & in venis, aliis humoribus adhuc est mistus, mitis est, minusque corpus infestat; Quando verò movetur, & ab aliis succis segregatur, redit ad geniū, fit deterior, corrumpitur, corpusque infinitis modis lædit, quemadmodum *eleganter hæc Galen, l. de sympt. caus. notavit.* Colligitur in parte vel sensim, vel ἀθρόως & confertim influit, præprimis accedente membri debilitate, calore & dolore.

Hermetici, carcinomatis hujus causam ducunt ex sale Tartareo excrementoso, Arsenicali & Realgarino, quod separatur à sale dulci balsami naturalis nostri, tanquam quid contrarium vitæ, adeò mordax & causticum cum peculiari quadam malignâ qualitate, ut habeat potentiam urendi, & causticandi, doloremque excitandi, non secus ac caustica potentialia, ut scribit *Joh. Faber Monspel. in Chirurg. Spagy. p. 142.* Hoc *Spagyricorum* effatum non esse planè de nihilo, etiam iis patet, qui vel à limine tantum *Chimiam* salutârunt. Spiritus enim acres, sal Ammoniacum sive volatile & fixum, cum excrementis nitrosis & tartareis in corpore nostro, naturaliter, etiam in optimè sanis reperiri, ex sanguinis, viscerum, & urinæ destillatione satis fit manifestum. Quod si itaque hæc salia ex viscerum debilitate, vel diætæ errore p. n. augeantur, volatiliaque cum fixo nitroso, vitriolato & tartareo misceantur, à mitioribusque succis seclusa per se existant; quid aliud habebimus, quam sal mixtum, corrosivum, qualiter ex mixture Nitri & Armoniaci, sive nitri & vitrioli fieri conspiciamus? Hisce infallibilibus & ad oculum clavis *Chimie* documentis fidem derogaturus, mirabiles casus à fide dignissimis authoribus in Praxi observatos attendat. Sic *Clariss. Dn. D. Döringius l. 1. de Medicin. & Medic. p. 109.* refert, quendam *Juris Licentiatum* urinam reddidisse, à quâ, ceu spiritu vitrioli, linteamina erosa fuerint. *Idem* in viro quodam Scorbutico, hæmorrhagiâ narium per intervalla laborante observavit, linteamina, quibus sanguis exceptus fuerat, ab eo corrosa fuisse

fuisse. *Schenckius* etiam *observ. l. 3. sect. prior. observ. 62.* æru-
ginosam bilem sæpè vomitu adeò acrem rejectam esse, ut
pelves argenteas colore floridissimo infecerit, & acri-
monia ita eraserit, ut nec lotura illum delere, nec fortis fri-
ctio cassare potuerit, attestatur. Similia exempla ab aliis
quoq; enarrantur, & etiamnum moderno die in Praxi sæ-
pius occurrunt. Quæ sententia si rectè attendatur, non mul-
tùm à *Galenicorum* opinione aberrare videtur: siquidem & ii
ipsi salem corrosivum in atrâ bile abundare, haut obscure in-
nuunt, ut apparet ex *Galeno lib. 2. de nat. facult.* ubi inquit:
quod bilis atra sit fex usta & admodum calida, adeò ut carnem
quasi urat, liquet, & corrumpat. item *l. de atr. bil.* eâ aceto acerr-
mo, vini fecibus, oleiq; amurcæ comparat, additq;, quod qui-
bus corporis partibus pura impermixtaq; adhæserit, eas pror-
sus exedendo ulceret. Et *14. meth. med. c. 9.* adnectit: *Sunt Medici*
qui mihi eum (crassum sanguinem) non absurde videntur feci,
quæ super vini doliis hæret, adsimilare. Ergò hic humor, ubi ampli-
us incaluerit, aut propter putredinem, aut febrem phlegmonodem,
nigram efficit bilem, quam nullum animal, ne ipsi quidem mures
gustaverint; terra quoq; raditur ab eâ: ac partes quæ raduntur, o-
mnes in altum attolluntur. Idem tandè *Hippocrates 4. aph. 22. 23.*
24. confirmat. Quamobrem si rem ad vivum refecare veli-
mus, *Hippocratici* cum *Hermeticis* hîc diversis tantùm appella-
tionibus dissentire, re ipsâ verò planè unum idemq; sentire,
videntur: quicquid enim illi per humores declarant, hi per sa-
lia in humoribus contenta clariùs ante oculos ponunt.

CAUSÆ MEDIATÆ NATURALES sunt epatis & lie-
vis intemperies calida & sicca, quæ sanguinem adurit, copio-
sam bilem generat, & tandem in atram vertit. *Symbolum suum*
etiam hîc confert, ventriculi nec non intestinorum, sive nati-
va, sive ex crapulâ, & enormi diætâ, introducta imbecillitas.
Communes enim hi totius corporis famuli, si à justo tempe-
ramenti statu dejiciantur, fermentatioq; interturbetur, par-
tes excrementitiæ & tartareæ incibo & potu non rectè separā-
tur; sed chylo crudo immixta ad reliquas partes deferuntur,
progressuq; temporis ulteriùs exaltantur, exuruntur, variisq;

obstructionibus, succoq; acri & corrosivo materiam satis aptam subministrant. Non omni caret culpa dispositio hæreditaria, quâ atræ bilis seminia statim cum sanguine & lacte materno in sobolem derivantur. Vidit hoc *Zacut. Lusitan.* qui *l. i. de Prax. Med. admirand. observ. ii.* refert, pauperulam mulierem exulceratum cancrum in mammillâ per multos annos gerentem, in lectulo noctu cum tribus filiis, omnibus simili contagio infectis, decubuisse.

NON-NATURALES sunt, quæcunq; melancholicum ac fervescentem humorem, sive retorridum sanguinem generant, & communiter *ex quatuor classibus* dijudicantur.

EX ADSVMENDIS sunt cibi vitiosi, crassi, & calidi, qui facile succum melancholicum suppeditare possunt, ut panis furfuraceus, lentes, legumina, carnes fumo induratae, caro cervina, bubula, hircina, aprina, leporina, suilla, cochlearum, limacum, & grandium marinorum piscium. Acidatæ, salsa, acria, ut acetum, piper, sinapi, allia, cepe, & arida, torrida, assa, frixa, & vehementer exsiccata, cæteraq; humorem atrabilarium coacervantia. Hisce clare *Galen. 2. ad Glaucon. c. 10* adstipulatur. In *Alexandria*, ait, plurimum cancer generatur ob victus rationem. Comedunt enim farinam elixatam & lentem, & cochleas, & pura salita, & nonnulli ex ipsis carnes asininas, & alia quædam, quæ crassum humorem generant. Porro in malo hoc ovo excludendo non minimam sustinet culpam, potus crassus & feculentus, vina potentiora crassa, nec non austera, item aquæ tartareæ, & spiritu lapidifico præditæ, quales in *Saxoniâ* circa *Schöningensium urbem* inveniuntur; quæ licet sat sint claræ & limpida, spontè tamen tophosam & tartaream materiam, in vasis & canalibus per quos feruntur, deponunt. Illa materia tophosa insipida quidem est, insignem tamen corrodingi vim in recessu habet, quod colligitur ex piscibus in dictâ aquâ fervatis, quibus & oculos corrodit, & carnes brevi temporis spatio exterius consumit. Hinc etiam in illo loco etsi incolæ à potu istius aquæ sibi valde caveant, citius tamen quàm alibi ægros cancro, similibusq; affectibus laborantes invenire licet.

EX AGENDIS sunt motus violentus, nimia quies, immodica
vigilia, animi pathemata, ira praesertim, moestitia, & vehe-
mens sollicitudo. EX FORIS INCIDENTIBVS aer, qui si
nimis calidus & siccus, prout *Gal. 2. ad Glaucon. c. 10. in Alexan-
driâ* illum describit, fuerit, humores adurit, fundit, & versus
cutem movet. Hinc in nostrâ *Germaniâ*, ubi constitutio aeris
alia, hic affectus, teste etiam *Galeno*, rarissime conspicitur: ni-
si forsan vel diata error, vel cibi fumo indurati & falsi, ut in
locis maritimis, vel aquae tartareae ansam ad eum producen-
dum, obtrudant. EX RETENTIS ET EXCRETIS sunt ali-
cujus consuetae evacuationis, ut praepriis menstruarum pur-
gationum, haemorrhoidumque; suppressiones & obstructions.
Quemadmodum enim teste *Hipp.* fluxus haemorrhoidum su-
perueniens, morborum melancholicorum solutio est: ita &
intempestiva suppressio eosdem reducere, accedenteque; adusti-
one, & ipsum cancerum efficere potest.

PRÆTER. NATURALES quoque; sunt promptissimi
huius infortunii fabri, ut scirrhii. Hi quidem oriuntur ex hu-
more melancholico. Quod si verò diutius durent, aut sinistrè
tractentur, in cancerum abeunt, ut liquet ex saepius allatis *Ga-
leni* locis. Tumores & ulcera maligna, in quibus humor atrabi-
larius propter malam & virulentam partis dispositionem,
corrumpitur, in genuinum etiam carcinoma facessere posse
scribit *Victor Trincavell. l. 3. consil. 110.* Varices item in cruribus,
aliisque; partibus, si intempestivè supprimantur, idem dant effe-
ctum: plerumque; enim, inquit *Mercatus Instit. Chirurg. l. 1. inst. 7.*
cancrofi tumores adnascuntur, quibus vel menses, vel hæ-
morrhoides, vel varices suppressæ sunt. *Febris quartana* tan-
dem hujus calamitatis scaturiginem adscribit *Fernel. de ex-
tern. corp. affect. l. 7. c. 3.*

DIFFERENTIÆ notatu dignæ sunt. RATIONE GE-
NERIS, omne carcinoma mali moris; in specie tamen alte-
rum altero benignius esse, *Gabriel. Fallop. tom. 3. c. 19.* egregiè
testatur. RATIONE SVBIECTI alius cancer partes superi-
ores, alius inferiores, alius internas, alius externas occupat.
Et hinc etiam alius dicitur manifestus, alius occultus. Qui
B 2 qui-

quidem propriè occulti (*quos Hippocrates non curare tutius esse ait*) sint vocandi, inter authores non convenit. Nam per eos, omnes ferè antiquos Medicos, non ulceratos intellexisse, *Fuchsius* adferit. *Artius* verò per occultos ulceratos accipiendo esse, autumat. *Galen*i decisionem si respiciamus, eum etiam veterum opinionem sequutum, & occultos eos, qui sunt sine ulceratione, vel absconditos, hoc est, non apparentes nominasse, constat. *Mercatus Instit. Chirurg. Galeni* mentem explicaturus ita inquit: *occulti sunt non ulcerati, i.e. qui intra cutem jam duritiem habent exulceratam, ceterum cutis extrema citra noxam & ulcerationem apparet.* Idem tamen *l. i. de aff. mul.* à se ipso dissentire videtur, quando in hæc prorumpit verba; *Mihi autem arrisit magis eorum sententia, qui tenent, per occultos, Hippocrat. intellexisse ulceratos ubicumque sint, & non ulceratos si in recondita corporis sede immorentur: illud quidem, quoniam ea operatio, quæ ulceratos exagitat, multum excruciat, & debilitat egrotantem, nec finit morbum, cujus origo jecur est: hoc verò propter loci commoditatem ineptam operationi manuum, & fluxum sanguinis, quem compescere in abditis corporis sedibus perdifficile est.* Verum in his diversissimarum opinionum biviiis, *Amat. Lusitan. in Curat. Med. 32.* sententiâ, præ cæteris mihi probatur, qui *Galenum* per occultos non solum eos, qui absconditi sunt, & non apparent, sed & eos qui apparent, & sine exulceratione sunt, intellexisse, certò adfirmat. **RATIONE CAUSÆ** videlicet atra bilis vel mitioris, vel acrioris, alius est cum vel sine ulcere; cum tumore magno vel parvo; cum dolore & cruciatu graviori vel leviori: cum calore, & duritie intensiore, vel moderata &c. **RATIONE TEMPORIS**, aliq. cancer est incipiens, alius confirmatus: alius recens, alius inveteratus. Circa æstatis finem, & per totum autumnum, item in ætate consistente & declinante, præ reliquis hæc homines invadit calamitas.

SIGNA (*quæ universa Medicina teste Galen. l. i. de const. Art. c. 15. fulcrum præstant*) **DIAGNOSTICA** **INCIPIENTIS** canceri plerumque obscura sunt, *Tract. 7.* inquit *Almansor.* Et *Galen. 14. meth. med. c. 9.* refert, cancerum incipientem difficulter cognosci, quoniam primò habet accidentia

mitissima & confusa. *Conjecturantur* autem exinde, quod vel patientis parentes cancrofi fuerint, vel quod corporis habitus melancholicus, & ante acta vita, vel diæta huic malo generando apta, præcesserit. Quando verò carcinoma legitimum generari debet, exoritur primò tuberculum, ciceris magnitudinem referens, quod ubi incrementū sumsit, fabæ magnitudinem æquat. Quare nihil miri est (*inquit Galen. l. 14. meth.*) si vulgus tunc lateat, non secus profectò quàm stirpes, quæ è terrâ jam exeunt; quoniâ hæ quoq; peritis tantùm agricolis agnoscuntur. Postea verò crescendo, indies ita sese attollit, ut mox ad juglandis, deinde ad ovi, deniq; ad melopeponis molem & figurâ accedat, & tam vehementia adferat symptomata, quæ cunctis evidentia esse possunt. AUGESCENTIS signa clariora, & manifestiora evadunt, quia tumor adest durus, inæqualis, immobilis, livefcens, nigricans, aliàs tamen magis, aliàs minus, pro materiæ adustæ & corruptæ diversitate. Dolor licet quidem aliàs minor, aliàs verò major sit, nunquam tamen planè abest; sed latè diffusus, & pulsans sentitur. Circum circa in orbem quasi venæ crasso nigroq; sanguine refertæ, & sicuti cancri animalis pedes exaltatæ, modò apparent, modò in profundo latitant, & delitefcunt, quo de confer *Fallop. tract. de ulc. c. 7.* Plura signa à *Galen. l. de tum. p. n. § 2. ad Glauc. c. 10. Hipp. de morb. mul. l. 2. sect. 5. Cornel. Cels. l. 5. c. 28. Paul. Aeginet. l. 4. c. 26. § l. 6. c. 45. Aët. serm. 16. c. 43 Ludov. Mercat. de mulier. affect. lib. 1. c. 17.* & ab aliis classicis autoribus traduntur, quæ apud illos videri queunt. Et cancer hic coërceri vix potest, quin brevi exesâ cute prorumpat, fiatq; *exulceratus*, ubi non modò prædicta adsunt signa, verum etiam ulcus visu horrendum, corruptæ carnis speciem repræsentat, cum labiis duris, crassis, tumidis, inversis, sublevatis, & cavernosis. Color hujus ulceris inter rubrum & nigrum medius est, utpote fuscus, plumbeus, aut lividus; & ita malus, ut intuentibus non rarò horrorem incutiat, nauseamq; excitet. Saniem emittit exulceratus fætidissimam, & copiosissimam, aliquando tenuem & aquosam, aliquando nigram aut fulvam. Vapor exspirat naribus gravis. Inveterato & summè putrido, febris lenta superve-

nit: Adest fastidium, inquietudo, animi angor & frequens animi defectio, imprimis si mammas pro subiecto habeat. Exe-
sis deniq; & corrofis venis, sæpe sanguis profunditur, car-
nesq; vicinæ depascuntur, ut mors maturius obrepat, mise-
rando ægoti statui exoptatum finem additura.

Cæterum scirrhus cum cancro quandam habet co-
gnationem, facile tamen utrumq; poterit distinguere, qui
non *sinistro* natus est *Appolline*. Etenim 1. *Cancer* dolorem
habet pungitivum periodicum, qui cessat & redit; ut in ulce-
re videntur esse acus transeuntes, ex unâ parte, in alteram: in
scirrbo verò dolor planè nullus, vel tantummodò obtusus sese
offert. 2. *Cancer* plerumq; ex se incipit, subitoq; incremen-
tum sumit, ita ut ex minimâ quantitate, in maximam molem
excrescat, humorq; majori ex parte in venis residet, quæ re-
pletæ canceri pedes & brachia referunt: *Scyrrhus* autem ut plu-
rimùm ex aliorum tumorum permutatione, originem ha-
bet, & humor qui scirrhum efficit, non in venis præcipuè, sed
in spaciis & poris partium residet, unde venas tardiùs quàm
cancer incrementum sumere, ait *Sennert. Prax l. 5. part 1. c. 20.*
3. *Cancer* in partibus carnosiss, raris, & fungosis; *scirrhus*
verò, in pluribus durioribus partibus exoritur. 4. Licet
uterq; ex melancholico humore fieri possit; *scirrhus* tamen,
ex melancholiâ naturali ortum habet; *cancer* autem ex præ-
ternaturali, quæ etiam dicitur cum additione, bilis atra ex-
quisita, & à priori differt, sicuti fex usta à non usta. Fit enim
vi caloris intensissimi adurentis, & perducentis, absumptis
partibus liquidioribus, ad ultimum siccitatis gradum, qui
cadere potest in humores, id quod autores incinerare vocant,
unde etiam aciditate tantum acquirit acrimoniæ, ut nō mo-
dò carnem ulceret & erodat, verum etiam terram, tanquam
aqua fortis fermentet.

PROGNOSTICA supersunt, ubi primo statim limine
consideratione illâ dignissima, ac diu agitata controversia,
sese obfert, *an nimirum cancer sit morbus curabilis?* quâ de au-
tores minimè ὁμοψήφως esse, constat. Verùm quæstionis
huius decisio ex sequentibus habebitur. RATIONE GENE-
RIS

RIS omnis cancer morbus gravis, periculosus, & difficilis est. Nam magnum, inquit *Mercat. in Institut. Chirurg.* solet cancer facessere negotium; quia à toto genere morbus est gravis & periculosus, quod mitiora contemnat remedia, & majoribus exacerbetur, & fiat particularis elephantiasis: probat eventus, nullam, aut difficulter admittere curationem: quia, si radicitus evellatur, vel ulcus remanet cancrosum & immedicabile, vel malum revertetur, aut in aliam partem decumbet, ubi majus & gravius accersit periculum, & ob id dictum est ab *Hipp. 6. aph. 38.* citius perire eos, qui curantur. *Avicenna* etiam facit mentionem mulieris, cui altera mammilla cancro affecta, & radicitus extirpata, altera cancrofa confestim evasit.

RATIONE SUBJECTI incurabilis est, si nobiliorem aliquam partem occupet, & in profundo lateat, ut in palato, sede, utero, intestinis & similibus. De hisce inquit *Nicolaus Rocheus*; Equidem scio omnes, qui hujusmodi canculos curare tentaverunt, magis illos irritasse, & brevi homines interemisse. Nam & qui cancerum in palato constitutum, & in sede, & in sinu abscondito muliebri vel usserunt vel secuerunt, non potuerunt ulcera ad cicatricem perducere, & homines in curâ afflictos ac maceratos usque ad mortem colliquârunt; qui si nullam curationem adhibuissent, longiore tempore vitam cum minori molestiâ transegissent. Tales igitur canculos nullo modo curare tentemus. Quod si verò in summâ corporis parte consistit, curabilis est, & quidem in initio, cum adhuc exiguus, faciliorem admittit curationem h.e. sectionem, vel unctionem, vel aliam mortificationem, sicque illum unâ cum omnibus suis radicibus, i.e. venis circumstantibus, atrabilario humore repletis, quæ *Galen. 2. ad Glaucon. c. 10.* radices dicuntur, exscindere & penitus extirpare conducit, modò sit in parte sectionem & unctionem admittente. Sed cum jam major evaserit, curatio Medico etiam peritissimo sit periculosa plenum opus alex.

RATIONE CAUSÆ curatio est in ambiguo: quoniâ omnes exulcerationes ex atrâ bile insanabiles & incurabiles *Galne. lib. de atr. bil.* pronunciat; maturè tamen si Medicus vocetur, spem de recuperandâ sanitate aegroto adferre poterit. Exulce-

ratio verò si sit inveterata, & confirmata, oleū & operam ferè perdet, quicunque medicamentis periculum facere tentabit. Locum itaque tum tantum habet curatio palliativa, lenitiva, augmentumque ulterius prohibens. Æthiopem etiam lavabit, qui serpentem hanc vomicam ex primis generationis principiis implantatam eradicare conabitur: licet enim semel curetur, denuò tamen repullulascit.

INDICATIONES, à quibus *Galen. 2. meth. med. c. 7.* vera methodus medendi inchoanda, defumuntur vel à causis canceri mediatis, vel immediatâ seu cancro ipso in parte aliqua hærente. Causæ videlicet mediatae, indicant atrabilarii in corpore redundantis humoris remotionem, immediata verò sui & tumoris cum, vel sine ulcere, cancrosi eradicationem, dolorisque lenitionem. Materia remediorum defumitur ex usitatis fontibus,

CHIRURGICO, VENÆSECTIO juxta *Galen. l. 2. c. 10. ad Glaucon.* statim administranda est, si ætas & virtus permiserint: quoniam non fit carcinoma, nisi sanguis crassus, impurus, limosus, & vitiosus in toto corpore abundet. Potest itaque cum revulsione, tum derivationis gratiâ, institui. Salvatellam, quam alii in affectibus melancholicis aperiendam præscribunt, *Nicolaus Rochus* hic commendat. A mensium obstructione, si cacoëthes foveatur, è saphenâ pedis sanguis mittendus. In occulto etiam cancro, & ubi spes de perfectâ curatione est nulla, phlebotomia per longiora intervalla repetita augmentum tumoris prohibet, doloris vehementiâ non leve levamen allatura. Et longè præstantius & utilius impedit augmentum FONTANELLA, è directo partis affectæ aperta, per quam facilè exspiret, quod futurum est, non solum augmenti, verum etiam exulcerationis causa. Phlebotomiæ succedit SCARIFICATIO, quâ de *Galen.* videatur, & *Hipp. lib. de ulc.* consulatur. *Fel. Pater, tom. 2. Prax. p. m. 843.* scarificationem, in distantiore vel viciniore loco vel revellendo, & derivando extollit in plethoricis, præcipuè viribus constantibus, dum adhuc crescit cancer, ut augmentum illius aliquo pacto inhiberi possit. Debet autem scarificatio nunc levior, nunc pro-

profundior, nunc cum, nunc sine cucurbitulis fieri, pro ratione indicantium, & prout materia evacuanda superficialiter, vel profundè hæret, aut plus sanguinis evacuandum est.

FRICTIONES & LIGATURÆ humores fluentes revellunt, & intercipiunt, & interdum utilissimè adhibentur. **HIRUDINES** prout plures vel pauciores, venis majoribus, vel minoribus applicantur, venæ sectionis vices in debilioribus præstant, ut jamdudum *Avicenn. 4.1.c.22. & Plin. l.32.c.10.* allegante *Zacuto Lusitano 1. hist. princ: 4:* profundiore extractionem per sanguifugas experti fuerunt: Hinc etiam ad hæmorrhagiam sistendam, *Galen. de Hirud.* peculiariter præscribit & ad movet emplastra. Cavendum tamen, ne in earum electione casu error committatur, de quibus *authores Chirurgici* plurimus agunt. *Ambros. Pareus de tum. contr. nat. c.30.* Hirudines ex ulcerato cancro, quâ parte dolor punctorius acrius urgebat, applicuisse, & magnos cruciatus sedâsse, legitur. *Franc. Peccet. 1. c.30.* hirudines hæmorrhoidibus si eæ fuerint retentæ, cum ructu adhibuit. Et minùs tuta est apertio venarû hæmorrhoidalium phlebotomo facta, quam sæpè male cessisse, *Crato consil. 205. & Dionisius Daza l.3. de Apostem. c.187.* meminerunt. Quod si hæc omnia nil prodesse comperias; extremis morbis, extrema remedia, juxta *Hippocratis* monitû deberi scias, succurrat **FERRI & IGNIS** operam imploraturus. Cautè tamè & cum maximâ circumspèctione, ad opus te adcingas: Nam aut non sanescunt ægroti, etiam si feliciter cedat sectio, ut *Celsus* prædixit; aut fluxu sanguinis periclitantur; aut in cancerosum locus degenerat affectio, vel in maniam, paralyfin, animi delirium, aliaq; gravissima mala cômigrat humor, è loco ad quem fluere solebat, repulsus. Quamobrè non occultos, non internos, nec infartos, non propè membrum princeps, neq; ulceratos; sed solum parvos cancras, quos vulgus caratanes, qui medii quasi sunt inter cancerum & scirrhum, sectione extirpare, *Mercatus* jubet. Modum mammillarum cancrum secandi, incomparabilis *Dn. D. Rolfinckius, Preceptor & Promotor meus* viternum observandus, in ser. operat: precip. chirurg. part.2.c.1. talem proponit: Liganda tota mamilla, firmiter constringenda filo subtili, & comprimenda: animadvertenda vasa per quæ

cancer nutrimentum suum accipiat: totaq; mamilla excindenda est, ferroq; candente hæmorrhagia prohibenda. Operatio hæc cum ancipiti successu. Metuendū enim ex hac hoc incommodi; n in aliis locis scilicet in alterâ mamillâ, vel utero repullulet. Quæ sæpè fit, & si accadat pro desperatâ relinquenda. Ulceratum labris felici cum successu se amputasse Schenckius observ. 41. gloriatur. Galen. 14. meth. med. c. 9. in sectione, hæc nota digna monet: Ubi verò totum, inquit, quod vitiatum est prorsus excideris sic, ut nulla supersit radix, sine effluere sanguinem, nec properè eum inhibebis: imò premendo potiùs quæ circum sunt, venas, exprimes ex his crassiorem sanguinē: mox aliis ulceribus similes curabis. Post abscissionem, vel pelliculæ, vel folliculi, aut tumoris aliquid in ulcere remansit, unctione opus est. Alii scissionem & unctionem per vicinantis per repetunt, dum tota cancerosa pars fuerit mortificata. USTIO autem instituitur vel ferro candente, vel medicamentis causticis. Mercatus caratanes aliquando curavit, infixo cauterio uno vel duobus, & immisso grano arsenici, & cooperto vulnere butyro vaccino, quo ferè paucis horis aut diebus decidit glandula universa, aut tumor, si nondum canceri naturam attigerit. Summâ tamen cautione a unctione accedamus, ne partes circumstantes inflammantur & humorum confluxu occupentur; quod incommodum de vitabitur, si loca cancerum circumambientia, unguento defensivo, utpote ex Bolo Armen. & Terr. sigillat. muniantur.

PHARMACIA mandat, ut humores vitiosi & superflui, & qui huic morbo suppetias ferunt, præparentur atq; educantur, viæq; probè prius aperiantur, juxta Hippocrat. aph. 10. τὰ σώματα χρὴ ὅκως αὖ πρὸς βέληται καὶ δαίρειν, εὐνοῦ ποιέειν. PRÆPARANTIA sunt, syrup. de pom. fumar. simp. & compos. è succ. borrag. bugloss. de Lupul. Ceterach. Byzantin. Mel Rosar. Sed hîc animadvertendum, quod *Attenuantia* & *Incidentia* commodè admisceri possint, ut Aceto. Beton. Meliss. Scolopendr. quibus Liquirit. Passul. quia sic citatem retundunt, non immeritò adduntur. Et ut meliores penetrationem acquirant, oxymel in paucâ quantitate, vel suc-

cum

cum Citri depuratum, sive spirit: Oli \odot tis adjicere, non est
inconveniens. Nec postremas hinc partes *Chimica Digestiva*
& *Aperientia* obtinebunt, cremor nimirum & crystall: Φ ri,
Epatic. rubr: Φ r. \odot lat. & Croc. \odot tis aperitiv. Hisce omnibus
præminere videntur, crystall. Φ r. \odot lat: Φ niales, *Excellētissimi*
Dn. D. Michaelis, P.P. in Academia Lipsensi celeberrimi, Hermē-
tis decantatissimi, Præceptoris & Fautoris mei etatē colendi:
crystalli enim isti non solum egregiē digerunt & aperiunt,
sed etiam sanguinem optimē purificant.

Convenienti humorum præparatione peractâ, CA-
THARTICA primò benigna, dein & fortiora quàm maxi-
mè profunt. Ubi statim inter alia summo ab autoribus ce-
lebratur encomio, serum lactis caprini, in quo cuscut: epi-
thym. polypod. Senna & similia infundi possunt. Stæchad.
Arab. & thym. idem præstare ac Epithym. refert *Prævot. de mat.*
med. p. 288. Composita etiam a Medicis Practicis maximo cum
emolumento adhibentur, ut syrup. de Epithym. *Mes. Elect.*
Diacatholic. Diasenn. Nicol. Extract. Ellebor. nigr. Confect.
Hamech. Pil. Ind. Mes. de fumar. Hier. Picr. Galen. item Ag-
gregativ. Extract. quoq; Lap. Lazuli Hartmann. Prax. Chimiatr.
& extract. Panchymagog. *Crollius in Basilic. Chemic. laudibus*
extollunt. Hisce interdum aliquot grana Φ rii vitæ vel dulcis,
vel croci metallor. immisceri queunt. Φ ruber per \odot & \ominus ex
capite mortuo aq. fort. sublimatus pro arcano deprædicatur.

Et cum humor peccans unica vice educi nequeat, sæpi-
us per vices præparantia & purgantia repetere, utile erit &
proficuum: imprimis sedulo studendum, ut si morbus isthic
ex suppressis evacuationibus consuetis, originē suam habeat,
simul illæ retentæ evacuationes, tum in viris per hæmorrhoi-
des, tum in fæminis, quæ sunt ætatis congruæ, per menses, de-
centi modo provocentur. In quem finem *Vina Medicata*
utilissimè propinantur. Porro diligenter cavendum, ne no-
va in corpore materia gignatur, quod fit, si reliquiæ humoris
peccantis corrupti, prorsus absumantur, & interiores partes,
ut cor, cpar, & lien coroborantur, juxta *Galen. 14. meth.*
med. c. 9. Communis canceri curatio est, ut humorem unde viti-

um est natum, ilicò vacues, simili vacuationis genere ei, quæ in aliis tumoribus supra est comprehensa: mox prohibere, potissimum si fieri potest, ne de cætero ejusmodi succus in venis colligatur: Sin id fieri nequit, saltem eum omninò ex intervallis vacuare, & simul particulam firmare, ne quid humorum redundantie ad eam confluat. Cui scopo inserviunt, serum lactis caprini chalybeatum, Decoct. Rad. Chin. ut & CORDIALIA, EPATICA, SPLENETICA pro intentione Medici, insignem hîc præbent usum, quorum uberrima seges in libris Medicorum Practicis demetenda est.

Posthæc BEZOARDICA & DIAPHORETICA utilia sunt, ut Decoct. Chamædr. Lign. Quajac. Chamomill. fumar. fassafrass. sarsaparill. correct. Rad. Cichor. Endiv. additis aliquot guttis spirit. Oli Item Terr. sigill. off. de cord. cerv. Bol. Armen. Rad. contr. Cherv. Theriac. *Andromach.* Mithridat. *Damocrat.* Confect. Alchem. Pulv. Pannon. *Cæsar.* rub. Bezoard. *Sennert.* cum aq. borrag. scord. galeg. Card. Bened. Cordial. Saxon. Theriacal. aliisq; adpropriatis in formâ potiunculæ exhibita. *Spagyri* tradunt C.C. f. ign. calcinat. spirit. C.C. Lign. Sanct. sanguin. Human. flor. sambuc. Card. Bened. Mistur. simpl. Oliat. & nium Diaphoret. Oli Absynth. fumar. C.C. volat. Card. Benedict. Bezoardicum Joviale & Minerale cum vel sine Oli, in exiguâ quantitate magnas obtinent vires. Nec desunt, qui carnib. Therorum, sive viperarum, summas hîc laudes adscribunt, quia omnem venenositatem ad cutem expellere, & occultâ qualitate, causæ carcinomatîs proximæ resistere creduntur. In quorum Therorum defectu, Trochisci de viperâ quales *Patavi* præparant, substituantur. Et ad virium conservationem, omnis generis CONFORTANTIA tam interna, quam externa, possunt administrari.

Sed si hisce prædictis tumor non cedere vellet, *Galenus* l. 14. meth. med. c. 9. INCIPIENTI CANCRO REPELLENTIA, quæ non sunt nimis levia, quia nihil agerent, nec nimis valida, quoniam nimis constiparent, sed MEDICOCRIA applicat, ut ipsius augmentum impedian. Con-

veni-

veniunt in hunc usum, omnes Intybi species, solan. Hyperic. Agrimon. ormin. sylvestr. succ. Rosar. Plantag. Polygon. lactuc. fol. & capit. papaver. Mucilag. sem. Cydon. Psyll. Rad. symphit. major. *Modum utendi varium vide sis apud Gabriel. Fallop. c. 19.* Emplastrum quoq; ex Ammoniaco aceto dissol. multum hinc valere scribitur. AUGESCENTI verò CANCRO, REPELLENTIA adponenda sunt VALIDIORA, ut cadmia, spodium, pompholyx, calx, lythargirum, & reliqua metallica, prius exusta & pluries abluta, quæ, postquam acredinem illam, & summam quam habent caliditatem, tum per unctionem, tum per ablutionem amiserint, in pulverem redacta, cum *supradictis repellentibus* in mortario plumbeo agitantur, & additâ ceræ f. q. ad consistentiam unguenti lento igne commiscentur. Plumbum etiam maxime ac omnibus commendatur, quocunq; etiam modo administretur, unde omnia medicamenta, quæ cancro adhibenda, in mortario plumbeo cum pistillo plumbeo optime conficiuntur, quod de *Galen. l. 9. de simpl. med. fac. cap. de plumb.* quod molybdos Græcè eidem dicitur, attentè legatur. Unguent. de plumb. & Empl. Diapompholyg. hinc ferè primas tenent.

Nonnulli etiam validioris SICCANTIA & ADSTRINGENTIA in usum omninò trahi posse opinantur, quorum uberiorem catalogum *Plater. tom. 2. Prax. c. 17. p. m. 846, 847,* recenset. Cum verò interdum parum hisce efficiatur, SPECIFICA, & occultâ qualitate agentia, quæ triplex vegetabilium, animalium, & mineralium regnum exhibet, succenturiatam operam præstabunt. EX VEGETABILIBUS ceterach, scrofular. Geran. Robert. cancro sanum ob id dictum, quod quibusdam *Myrrhis Dioscoridis* esse putatur, *Guido de Cauliac. tract. 4. de ulc. c. 6.* summo perè laudat. *Valescus polytrichum*, quod divinum in cancro sanando vocatur, & capill. ♀, Gentian. Pilosell. maxime commendat. *Dioscorides* Galio ps. f. urtic. mortuam, & Dracuncul. major. *Galen. l. 6. de simpl. med. fac.* extollit. *Gabriel. Fallop.* Virg. aur. sarmentos. & *Forest. Chirurg. observ. 6.* Verbasc. i. e. Taps. Barbat. probatur.

tur. *Theodoric. Chirurg. l. 3. c. 6.* cherefol. cum melle tritum, & lolium cum modico sale & aceto mistum, cancerum & depa-
scentia vulnera curare scribit. Nec infimo subfello ponit.
Centinod. *Arnoldus*, & *Rutam Serapio*, quam cum passulis
miscet, & carcinomati multo cum juvamine adplicat. Fo-
lia etiam mollia fraxini, & lentes in aceto coctæ cancro satis-
fecisse leguntur. EX ANIMALIBUS canceri fluviatiles, co-
chleæ, & virides ranæ, carnes suas exhibent, de quibus *Sen-
nert. Prax. lib. 5. part. 1. c. 20.* uberius agit. Anser & Anas ob-
ferunt sanguinem calidum, cuius usum *Aët. serm. 16. c. 47.* do-
cet. Asinus lac præbet, quod leniendæ humoris canerosi
acrimonie accommodatissimum esse, dicit *Ambros. Par. l. 6. de
tum. contr. nat. in gen. c. 28.* Grus caput & ventriculum
suum, furno siccatum & pulverisatum, cancro superaspexit,
eique levamen addit, teste *Petr. Bayr. de Apostem. tract. 1. c. 7.*
Bufo etiam exustus, & vipera exuviis suis pro canerosi affe-
ctus salute excubant, prout historiæ gravissimorum Medico-
rum experienciâ probatæ palam faciunt. Pullos denique
gallinaceos, & catulos canum vel felium recens natos, in
longum sectos, & statim impositos, perniciosum istud ma-
lum sanasse, experti fuerunt *Maurit. Cord. in lib. 1. Hipp. de mul.
comm. 7. & Ambros. Pareus l. 6. c. 30.* EX MINERALIBUS
Roland. l. 1. c. 20. Alumen Zuccharinum, cum succo pimpi-
nellæ distemperatum, & cancro superimpositum, honorificè
extollit. *Christophor. Guarinon. consult. med. 403.* Saphyra,
atque Smaragdo, ad canceri curationem multum laudis tri-
buit. Arsenicum quoque tanquam canceri specificum,
omnibus antestare jactatur; cum verò nimis corrosivum sit,
electum, præparatum, & cum aliis adpropriatis mixtum usur-
pari debet. Et ex omnibus & singulis hisce simplicibus, ad
utendi commoditatem composita arte fieri possunt plurima,
quorum formulas impræsentiarum adnectere supervacane-
um est.

CHIMICA silentio hîc prætereunda non sunt, quæ in
curatione carcinomatis egregiam præstant operam, ut Ma-
gister. ocul. 69. in aq. Persicariæ sæpius exhibitum. ol. item
do

de stibio & de fecibus vini aut aceti, vel de ☉libus, aut ferro, vel ex plumbo, cristas attollere, & canero prodesse; scribit *Ludov. Mercat. de comm. mul. aff. l. 1. c. 17.* quorum extractionem latè docet *Anderhac. tomo ejus operis 2. fol. 722.* Et *Hartmann. in Prax. Chimiatr.* oleum Arsenici fixi in aq. plantaginis distemperatum, & pulv. benedict. & oleum fuliginis magnificat. *Keslerus* exterius oleum ☿nii, Arsenici, ☉fuliginis, item Arsenicum fixum, cum rad. Aronis & fuligine mixtum, apprimè conducere putat. *Sunt, qui* magno cum fructu Balsamum & ☉Saturni exhibent, quod peculiari virtute ulcera maligna & cancrofa mitigare, & curare credantur.

ANODYNA suo loco Cancro deberi notum est, cum dolorem excitare incipit intensum. Etsi quidam sint, qui dicunt, quod oleaginosa meatus obstruant; tamen adeò non obstruunt, ut dissolutionem & exhalationem impediant. Ad dolorem igitur leniendum, cancrique furorem reprimendum, *Christophor. Gnarinon. consult. Med. 317.* oleum chamæmel. lumbricis terrestribus incoctis, admixto etiam Rosaceo, & ol. ex vitellis ovorum laudat. *Aët. serm. 16. c. 48.* cataplasmatibus ex melilot. sem. papav. cum passul. trit. & paululum decoct. ac subinde cum ovor. luteis subact. & commist. effectum prædicat. *Paul. l. 7. c. 67* Malv. Alth. in mulsâ subact. & colliquat. cum paucis rosaceo, efficacissimas leniendi vires in exacerbationibus habere, attestatur. Et ingentem horum anodynorum farraginem *Franc. Peccet. c. 30.* proponit, quam ibi videre licebit. NARCOTICA cum grano salis hîc in usum trahenda sunt: Tandem mortificato cancro, quod per bonitatem carnis, & carentiam virulentia, & foetoris cognoscitur, curetur ulcus, more ulcerum concavorum.

SYMPTOMATA ultimo loco, ut febris, vigiliæ, inquietudo, animi deliquia, & similia tractanda & auferenda essent. Verum enim verò, cum de his autores Practici non solum prolixè agant, sed & curationem adjungant, avidum horum indagatorem ad illos remittam, ubi aviditati suæ abundè satisfacere poterit.

DIÆTA instituat, quæ atræ bilis proventum infringat.

gat. AER eligatur purus, salubris, temperatus, & semper æquabilis. VICTUS sit attenuans, modicè refrigerans, & humectans, ut ptisana hordeacea, & in jusculis malva, spinachia, lactuca, oxalis, portulaca, cichorium, borrago, endivia, viola Martia, 4. femina frigida in usum vocari possunt. Et pisces saxatiles, avesque omnes, exceptis palustribus, prodesse vult *Oribas. l. 7. c. 13.* Sunt qui ova recentia, tremula, & forbilia liberaliter concedenda autumant, *quæ tamen propter bilis generationem aliquibus suspecta redduntur.* Carnes quoque animalium, ut vituli, vervecis, hædi, gallinarum, perdicum, caponum, & similium conveniunt, cum quibus cordialia incoqui possunt. Inprimis cancrorum carnem comestam, vel jus ipsorum bibitum, admodum probat *Plater. Prax. tr. 2. p. m. 843.* A quibus verò hic abstinendum, ex supra enumeratis cancri causis elucet. *Guarimon. conf. 513.* ex oleribus tanquam pestem brassicam vitandam esse, censet. In POTU cerevisia tenuis, & defecata exhibeatur, ut & aqua hordei cum passulis, ficubus, & herbis modicè refrigerantibus, præparata. Vinum conceditur optimum, oligophoron tamè, quia cancriferos præ cæteris reficit. *Vina Medicata, ex hepaticis, spleneticis, uterinis, & vulnerariis plantis composita, non sunt negligenda.* Omne verò crassum, recens, & feculentum vinum, & ejusdè generis cerevisia fugienda. Lactis usus hic valdè cōmendatur, quòd calorem & acrimoniam humoris atrabilarii corrigat. Hinc *Galenus* inquit, cancrum apud Scythas lactis potatores nunquam ferè apparere. MOTUS corporis vehementiores vix locum habent, sanguis enim fervidior ac concitator ad partem obsessam ruit, & vires etiam satis aliàs defatigatæ, magis debilitantur. SOMNUS debet esse moderatus, in virium tamen nimia imbecillitate paulò longior non nocet. ALVUS si est adstrictior, lenientibus aperienda, ut natura onere levata, cōmodiùs suum facere possit officium, unde *Avenzoar in Epist. ad Reg. Qui mollem habent alvum, paucis corripuntur morbis.* Cavendum autem, ne fluxus alvi excitetur, atq; ita vires magis dissipentur. ANIMI denique affectus omnes, præsertim immodici hic sunt vitandi, gaudiū verò moderatū, cū animū exhilaret, cor ac vitales spiritus foveat, præ reliquis cōvenit. *Oēs imò vitæ leges μέσσην ἀρετὴν respicere debeant.* At-

Atq; Hæc de Cancro in medium prolaturus fui. Plura
quidem materiæ gravitas & dignitas requirit. Verùm ne ex
Disputatione fiat Tractatus, vela contraho & Deo Medico O-
tīmō devotas animitus ago gratias, quod votum non solūm
neum secundaverit, sed navem etiam, ne in hoc concussi or-
bis motu à procellosis tempestatum fluctibus opprimere-
ur, salvam ad portum collocaverit, Cui sit Laus, Honor,
gloria, & Gratiarum actio in secula seculorum.

Hæres paterni nominis FINCKI inclyte
Amice suavis, splendidum Phæbi decus:
Virtute dum nitens vigoreq; ingeni
supra caducitatis hæc turbida
convexa scandis, lynceog; lumine
conquiris arma, & omne telorum genus,
Natura se quibus alma victrix vindicet,
& impetus eludat ægritudinum,
seseq; tutam sedibus firmet suis
si fortè flammeos rotaverit globos,
viteq; CANCER læta prædia occupet.
LAUDEM MERERIS. Digna Cedro Tempora
victrice gestit fronde cingere Apollo: quin
& lapsa cælo, mater alma gaudiij
Hygeia sudorum tuorum præmium
FELICITATEM porrigit promptâ manu.
Hanc fronte lætâ, menteq; alacri suscipe.

FINCKIO

Paternæ Medicæ doctrinæ
Experientiæ & felicitatis

LAUDE

Claro, & multis bonis
commendato

P. LICENTIA, Gradum DOCTORALEM petendi
& impetrandi, omnia fausta apprecatur

GUERNERUS ROLFINCK Phil. Med. Doct.
Practicæ & Chimicæ Profess. Publ.
Facultat. Senior.

D

Dira

Dira quæ CANCRI rabies per artus
fæviens omnes, celebri medentum
Arte pellatur, levis haud laboris
est opus unquam.

Tu tamen, FINCKI, generosa proles
stirpe Phœbæa fata, nil laborem
Improbum curans, aditum patentem
sternis ad alta;

Ritè sat promens cacoëthis atri
signa, funestum geniumque, *Cous*
Et simul quæ vel *Paracelsus* ipse
Pharmaca monstrat.

Regium idcirco meritò Tibi nos
Pandimus callem, penitus polito
Artium cultu, licet usq; livor
frendeat ipse;

Regium callem referamus; ædes
Dignus ut claras adeas honoris,
Te probes æquè populoque, nobis
atque probasti.

JOVA sacrato Zephyro supernè
Adsit inceptis, faveatque porro
Ausibus FINCKI placidus, beetque
Omnia. *Fiat!*

Imq; adponebat

Gothofredus Mæbius Med. D.
Profess. Publ. Facultat.
Medic. p. t. Decanus.

Hoc duplex Laudis punctum Famæq; meretur;
Et Matri & Natæ sacra tulisse simul. —
Matri, quæ Sophia est, quâ de celeberrima proles,
Ars-Medica, è Physico semine, nata fuit.
Hoc quoq; felici fecisti utrumq; labore
FINCKI, Mæonidum, Pæonidumque decus.
Mæonias etenim & Cycli septemplicis Artes,
Et quicquid Sophiæ Curia docta docet,
Et quicquid Cœus, quicquid divinior Hermes,
Et Medici scripsit docta caterva chori;
Omnem hanc doctrinam vigilace labore parasti,
Aonios versans nocte dieq; libros.
Hinc Tibi certatim nunc utraq; promit honores
Philosophiâ suos, & Medicina suos.
Illa quidem viridi obnubens Tua tempora Laurû,
Dat titulum, & quævis jura Magisterii.
Hæc, dum Pæoniam ingenti cum laude cathedram
Scandis, de CANCRO lemmata docta docens;
Hæc, inquam, meritò quoq; Te mactabit honore,
DOCTOR Æq; brevi summa brabea dabit.
Gratulor hoc igitur de laudis duplice puncto,
Et precor è cordis prospera quæq; sinu;
Et voveo, utq; brevi ternos superaddat honores
Alma Venus, jungens Phyllida pulchricomam.
Et sic Mæoniâ, sic Pæoniâq; beatus,
Sicq; Dionaâ laude beatus eris!

Clarissimo Viro
Dn. M. Johanni Nicolao Finckio,
Pro Licentiâ, Gradum in Facul-
tate Medicâ DOCTOREUM as-
sumendi, Disputanti, Domino
consalino & Amico colendo, ex
animo gratulor, & omnia fausta
atq; felicia apprecor

Johann Zeifold,
Phys. Prof. Publ.
FINCKI,

FINCKI, Conspicuum Pœoniæ Decus
 Artis, Dulce animi Dimidium mei,
 Quâ CANCER methodô, mortiferum malum,
 quæis herbis, validô quô medicamine,
 extirparier, & pristina partibus
 ægris integritas restitui queat;
 Hôc præsentè palàm dum foliô facis,
 doctâ quæque manu fusiùs edocens:
 Disponente DEO, JENA, Machaoni
 Sedes firma manens, en! rata jam facit,
 olim quæ Philyræ vota dedêre agri.
 Nostris nempè adeò favit & adnuit
 NUMEN consiliis. Ter benedicta sint
 EJUS Sacra sacro NOMINA nomine!
 NUTU cœpta SUO dirigat amplius!
 Sed totô ex animô nunc TIBI gratulor,
 cum voto: PATRIAM FAMAM ADIPISCERE!

Ita

FINCKIO, Theoriâ Praxiq; Claro,
 Competitori, atq; Amico suo exopta-
 tissimo ὁλοψυχῶς adprecatur

M. Johannes Zencker, Schleizâ-Variscus.

Quam parùm livor comitem malignum,
 Se usq; virtuti socians obesse
 Possit augustæ cupidâ Minervæ

Mente sacratis,

Id probas FRATER, stimulis petite
 Invidis, içtus animosior dum
 Surgis adversus, capiens honorum
 Summa brabêa.

Gratulor! bilis tumeat profusa,
 Invido, Tu DOCTOR abi, Tuosq;
 Prosperè fructûs mete, livido Te

Non remorante!

Johann: Otto Finckius, Phil. & S.S.
 Theolog. Studios.

F I N I S.